

欽  
定  
全  
唐  
文

欽定全唐文卷二百八十八目錄

張九齡 六

讓起復中書侍郎同平章事表

進千秋節金鏡錄表

荊州謝上表

賀赦表

賀冊皇太子表

洪州進白鹿表

爲兵部尚書王綬謝平章事表

爲信安王獻聖眞圖表

爲何給事進父所著書表

謝賜香藥面脂表

諫廢黜三王奏

上封事書

薛王有疾上憂變容髮請宣付史館狀

薛王薨上損膳請復膳狀

請御註道德經及疏施行狀

賀雨狀

論教皇太子狀

論內勘別宅婦女事狀

論東北軍未可輕動狀

論東北將吏刊石紀功德狀

請御註經內外傳授狀

西幸改期請宣付史館狀

上爲寧王寫一切經請宣付史館狀

賀張待賓奏尅捷狀

欽定全唐文卷二百八十八

張九齡 六

讓起復中書侍郎同平章事表

草土臣九齡言伏奉去年十二月十四日制復臣中書侍郎同平章事者外沮公望內奪私情餘生力微哀怖殞絕臣誠哀誠懼死罪死罪臣伏以宰相所職贊理庶事陶冶太和以遂萬物苟非所任有受其殃臣實單人本無大用況在難疚觸緒哀迷矧以素所不堪加之荒塞而軍國事重翼亮誠難臣獨何人謬居此地退省所有負敗將及雖

願感恩扶力匍匐祇命其如塵玷聖鑑污辱台衡於國非  
急於禮虛廢臣比年限役多闕晨昏疚疚之際遽乖救藥  
凶諱之日遠隔追攀而星霜未周冠冕載道是以庭闈昔  
絕几筵今阻凡曰名教實所深哀伏惟睿情有以永錫況  
質言非讓悲款不文祈天之心惟聖所體實冀哀素有次  
喪紀獲終俯鑒荒迷乞遂情禮臣無任感絕哀迫之至謹  
詣朝堂奉表陳乞以聞臣誠哀誠懼頓首頓首死罪死罪  
謹言開元二十二年正月二十七日草土臣張九齡上表

進千秋節金鏡錄表

臣九齡言伏見千秋節日王公已下悉以金寶鏡進獻誠  
貴尚之尤也臣愚以謂明鏡所以鑑形者也有妍媸則見  
之於外往事所以鑒心者也有善惡則省之於內故黃帝  
鏡銘云以鏡自照見形容以人自照見吉凶又古人云前  
事之不遠後事之元龜元龜亦猶鏡也伏惟開元神武皇  
帝陛下聖德之至動與天合本已全於道體固不假於事  
鑑然覆載廣大無所不包聖道沖虛有來皆應臣敢緣此  
義謹於生辰節上事鑑十章分爲五卷名曰千秋金鏡錄  
雖聞見褊淺所擇不深至於區區效愚其庶乎萬一不勝

惓款之至謹言

荊州謝上表

臣九齡言伏奉四月十四日制授臣荊州大都督府長史  
聞命皇怖魂膽飛越卽日戒路星夜奔馳屬小道使多驛  
馬先少以今月八日至州禮上誠惶誠恐頓首頓首死罪  
死罪臣不卽飲氣取死豈敢輒惜餘命伏念心無黨惡死  
則似同以此偷生猶希聖察臣往年按察嶺表便道赴使  
訪聞周子諒久經推覆遙卽奏充判官尋屬臣改官使亦  
有替其後信安郡王禕奏將朔方驅使便請授官臣因其



嶺外勤勞因而奏乞事不敢隱未至涉私然進用非人誠  
宜得罪但臣特蒙拔擢出自宸衷陛下所用隱微惟臣而  
已伏思報効竊恃聖恩每於事端無所防避智識雖淺罄  
竭則淺微誠區區義有所在豈復與此私協以負累聖鑒  
臣雖至頑至愚不至於此皇天后土照臣血誠夙夜煩冤  
欲辨無路臣聞物有窮者必訴於昊天人有痛者必呼於  
父母臣今孤苦不乞哀於聖君豈蒙惡聲遂銜冤以沒代  
臣受性愚鈍闇於知人稟命舛剝與此凶會誠合自死以  
謝天威所以側息苟存者臣爲聖朝所用旣極榮寵而一

朝至此恐玷明時在臣微生有若螻蟻身名俱滅誠不足  
言今釁咎則然恩禮猶重面目有覩夙夜唯憂戴盆望天  
豈期上達又未能宣布聖澤少答殊私跼蹐兢皇動失次  
第無任荷懼兢悚之至謹附河西經略判官所部朝義郎  
法曹參軍蘇銳奉表陳謝以聞臣誠惶誠恐頓首頓首死  
罪死罪謹言

賀赦表

臣言伏奉今月八日制恩春郊展禮惟新布澤臣聞古之  
王政雖在方冊將崇舊典必俟聖君伏惟開元神武皇帝

陛下德合天明道高帝載以爲春者發生之氣氣者含育之本事乃重於歲始禮故親於東郊振絕代之綱作名王之法布澤行慶昭德順時以合陰陽之和以乘天地之正凡在品彙莫不昭蘇臣待罪荆南亦濫承恩賜臣無任欣慶戰荷之至謹因所部送永王俸料官當陽縣主簿陳琇奉表陳賀以聞臣誠歡誠喜頓首頓首死罪死罪謹言

賀冊皇太子表

臣言伏奉今月二十日制冊立皇太子者伏以皇太子天實生德睿智夙備爰以吉辰光膺盛典伏惟開元神武皇

帝陛下建儲固本體天合聖萬方之心永貞是屬一人之  
慶大賚斯在臣某待罪荆南不獲稱慶闕庭欣躍之誠實  
百常品無任悚踴慶躍之至謹遣所部官宣義郎行枝江  
縣尉楊崇先奉表陳賀以聞臣誠歡誠喜頓首頓首死罪  
死罪謹言

洪州進白鹿表

臣聞聖法天則至理調於元氣天表聖則嘉瑞託於羣生  
將以幽贊王澤覺悟生靈知至德之所感如虛響之必應  
伏見開元神武皇帝陛下道孚神化體合乾行品物所資

太和罔不叶圖諫所載殊祥罔不臻故郡國上言日月相  
繼臣所部豫章縣某月某日獲白鹿一休氣所集靈質自  
呈欲效符祉易爲馴狎臣謹按瑞應圖云王者明惠及下  
則白鹿見又按孝經援神契云王者德至鳥獸則白鹿見  
蓋鹿者仙壽之物實爲禎祥之表雖時和歲稔固不假於  
羽毛而天意人事誠欲伸於耳目臣不勝感慶之至謹詣  
某所奉瑞鹿表進以聞臣誠歡誠喜頓首頓首死罪死罪  
謹言

爲兵部尚書王峻謝平章事表

臣駿言伏奉今月二十九日制授臣兵部尚書同中書門下三品殊常寵榮妄集疲朽承恩竊喜任重惟憂臣誠歡誠恐臣伏以虛受之難魯史誠以量力滿盈之過夏載陳其招損臣階緣試吏際會登朝遂得入拜尚書比天之喉舌出典方鎮爲王之爪牙雖忠烈之誠心知所竭而績用之美歲久無聞今陛下不以爲愚寘之廟堂之上委以軍國之謀實恐鼎足不任鵜翼爲刺退失微臣之守上累陛下之明是以永夕九飛終朝三省泉谷爲懼冰炭在懷道雖願於將行位固慙於幸得臣已有別狀具所讓人猶蒙

曲私未寢嚴命方欲俯僂恭命對揚休光磨鉛効於一割  
策蹇同於十駕臣誠懼塵台席謬齒國華將何以允答鴻  
私弼諧大化拜命祗惕罔知所爲臣不勝荷懼之至謹奉  
表謝以聞臣誠惶誠恐謹言

爲信安王獻聖眞圖表

臣言臣一昨扈從西狩岐陽時以有年事因農隙整六軍  
之眾修大田之禮戎卒是訓威武載揚屬草淺獸肥霜清  
氣殺詔虞人以卽鹿命荊州而起鳥陛下親御弧矢紆駕  
林衡曾不合圍取其背者雖有逸羣之狡走險之捷而飛

黃騁轡縈拂如組綠沈縱鏘宛轉若神必命中於前期皆  
應弦而絕倒其餘變態不測神妙無窮非臣瞽言所能模  
狀旣而備獻禽之禮虔薦寢之誠教人以孝自天作則此  
外效獲畢賜懿親兼禁羽騎無犯宿麥是行也典禮斯備  
仁恩允洽三令惟肅七德以宣魏武何階亦紀功於猛獸  
周文差擬將比義於非熊臣忝籍宗枝幸陪鑾輅竊觀神  
武冠絕古今以爲載之空言不若圖之繪事向所述聖今  
皆寫真雖天顏不違而丹青莫擬徒極愚思庶存萬一謹  
錄上陳伏渼戰汗臣誠惶誠恐謹言



爲何給事進亡父所著書表

臣言臣父某官某名往歷樞近志勤忠益至於霸王大略  
軍國要務事關興替言涉箴規因著十篇名曰帝國祕錄  
將欲獻納纔加撰次尋屬臣私門殃釁夙遘閔凶手澤所  
存心瞿不忍遂未奏御猶在緘滕二紀及茲遺言將墜誠  
愚臣不克負荷丕揚休烈俾亡父之業聖代莫傳雖忝振  
垣若寘冰谷伏惟陛下聽政中昃觀書乙夜思上皇而合  
道恨古人於同時而臣亡父所論君臣之際必欲驗之行  
事非直垂於空文誠宜上感宸衷由沒代而匡補下藏祕

府因聖君以發明竟未上聞伏增悲懼臣不勝感惕之至  
謹繕寫封進以聞謹言

謝賜香藥面脂表

臣某言某至宣敕旨賜臣衰衣香面脂及小通中散等藥  
捧日月之光寒移東海沐雲雨之澤春入花門雕匳忽開  
珠囊暫解蘭薰異氣玉潤凝脂藥自天來不假淮王之術  
香宜風度如傳荀令之衣臣才謝中人位參上將疆場效  
淺山嶽恩深唯因受遇之多轉覺輕生之速

諫廢黜三王奏

陛下纂嗣鴻業將三十年太子已下常不離深宮日受聖訓今天下之人皆愛陛下享國日久子孫蕃育不聞有過陛下奈何以一日之閒廢棄三子伏惟陛下思之且太子國本難於動搖昔晉獻公惑寵嬖之言太子申生憂死國乃大亂漢武威加六合受江充巫蠱之事將禍及太子遂至城中流血晉惠帝有賢子爲太子容賈后之譖以至喪亡隋文帝取寵婦之言廢太子勇而立晉王廣遂失天下由此而論之不可不慎今太子旣長無過二王又賢臣待罪左右敢不詳悉

上封事書

五月二十日宣義郎左拾遺內供奉臣張九齡謹再拜死  
罪死罪上書開元神武皇帝陛下臣所以上事以臣愚見  
並當時尤切不敢飾詞伏願陛下親覽可否之宜幸甚幸  
甚臣伏以陛下自克清內難光宅天下常欲躋人於富壽  
致國於太平聖慮每勤德音屢發然猶黎人未息水旱爲  
憂臣竊伏思之有由然矣臣聞乖政之氣發爲水旱天道  
雖遠其應甚速昔者東海枉殺孝婦旱者久之一吏不明  
匹婦非命則天爲之旱以昭其冤況今六合之閒元元之

眾莫不懸命於縣令宅生於刺史陛下所與共理此尤親  
於人者也多非其任徒有其名致旱之由豈惟孝婦一事  
而已是以親人之任宜得其賢用才之道宜重其選而今  
刺史縣令除京輔近處雄望之州刺史猶擇其人縣令或  
備員而已其餘江淮隴蜀三河諸處除大府之外稍稍非  
才但於京官之中出爲州縣者或是緣身有累在職無聲  
用於牧宰之閒以爲斥逐之地或因勢附會遂忝高班比  
其勢衰且無他責又謂之不稱京職亦乃出爲刺史至於  
武夫流外積資而得官成於經久不計於有才諸若此流

盡爲刺史其餘縣令已下固不可勝言蓋毗庶所繫國家之本務本務之職反爲好進者所輕承弊之人每遭非才者所擾陛下聖化從此不宣皆由不重親人之選以成其弊而欲天下和洽固不可得也古者刺史入爲三公郎官出宰百里莫不於其所重勸其所行臣竊怪近俗偏輕此任今朝廷卿士入而不出於其私情遂自得計何則京華之地衣冠所聚子弟之間身名所出從容附會不勞而成一出外藩有異於此人情進取豈忘於私但立法制之不敢違耳原其本意固私是欲今大利在於京職而不在於

外郡如此則智能之士欲利之心日夜營營寧有復出爲  
刺史縣令而陛下國家之利方賴智能之人此輩旣自固  
而不行在外者又技癢而求入如此則智能之輩常無親  
人之責陛下又未格之以法無乃甚不可乎故臣愚以爲  
欲理之本莫若重刺史縣令此官誠重智能者可行正宜  
懸以科條定其資歷凡不歷都督刺史雖有高第者不得  
入爲侍郎列卿不歷縣令有善政者亦不得入爲臺郎給  
舍郎雖遠處都督刺史至於縣令以次差降以爲出入亦  
不得十年頻任京職又不得十年盡任外官如此設科以

救其失則內外通理萬姓獲寧如積習爲常遂其私計陛下獨宵衣旰食天下亦未之理也又古之選用賢良取其稱職或遙聞而辟召或一見而任之是以士修素行不圖僥倖羣小不逮亦用息心以故姦僞自止流品不雜今天下未必理於上古而事務日倍於前誠爲不正其本而設巧於末所謂末者吏部條章動盈千百刀筆之吏辨析毫釐節制搶攘溺於文墨胥徒之猾又緣隙而起臣以爲始造簿書以備用人之遺亡耳今反求精於案牘不急於人才亦何異遺劍中流而刻舟以紀去之彌遠可爲傷心凡



有稱吏部之能者則曰從縣尉與主簿從主簿與縣丞斯選曹執文而善知官次者也惟據其合與不合不論賢與不肖大略如此豈不謬哉陛下若不以吏部尚書侍郎爲賢必不授以職事尚書侍郎旣以賢而受委豈復不能知人知人之難雖自古所慎而拔十得五其道可行今則執以格條貴於謹守幸其心能自覺者每選於所拔亦有三五人若又專固者則亦一人不拔據資配職自以爲能爲官擇人初無此意故使時人有平配之議官曹無得賢之實朱紫同色清濁不分是於聖朝有何裨益故臣以爲

選部之法弊於不變變法之易在陛下煥然行之假如今之銓衡欲自爲意亦限行之已久動必見疑遂用因循益爲浮薄今若刺史縣令精覈其人卽每年當管之內應有合選之色先委考其才行堪入品流然後送臺臺又推擇據所用之多少爲州縣之殿最一則州縣慎於所舉必取入官之才二則吏部因其有成無多庸人之數縱有不在送者妄起怨端且猶分謗於外臺不至喧嘩於南省今則每歲選者動以萬計京師米物爲之空虛豈多士若斯蓋渝濫至此而欲仍舊致理難於改制祇益文法煩碎賢愚

渾雜就中以一詩一判定其是非適使賢人君子從此遺  
逸斯亦明代之缺政有識者之所歎息也夫天下雖廣朝  
廷雖眾而士之名賢誠可知也若使毀譽相亂聽受不明  
事將已矣無復可說如知其賢能各有品第每一官缺而  
不以次用之則是知而不爲焉用彼相借如諸司清要之  
職當用第一之人及其要官闕時或以下等叨進以故時  
議無高無下惟論得與不得自然清議不立名節不修上  
善則守志而後時中人則躁求而易操其故何哉朝廷若  
以令名而進人士子亦以修名而獲利而利之所出眾則

趨焉已而名利不出於清修所趣多歸於人事其小者苟求輒得一變而至阿私其大者許以分義再變而成朋黨斯並教化漸漬使之必然故於用人之際不可不第高下若高下有次不可妄干天下士流必刻意修飾思齊日服刑政日清此皆興衰之大端焉可不察易曰履霜堅冰至言聖人之見終始之徵矣臣今所言上刺史縣令等事一皆指實縱臣所欲變法不合時宜伏望更發睿圖及詢於執事作爲長算振此頽風使官修其方人受其福天下幸甚伏惟陛下聰明神武動以聖斷正當可爲之運未行反

本之法微臣企竦竊有所望伏願少留宸睠稍覽愚誠必無可施行棄之非晚不勝塵露裨補之誠

薛王有疾上憂變容髮請宣付史館狀

右臣等伏見邠王守禮等表并答制以薛王業有疾聖情軫慮宿夕之間容髮遂變又尋繹致倦假寢通神因獲異方頓解危懼誠陛下友愛之至冠於皇王急難之情達於神道所以諸王陳請願書竹帛然猶讓此歸美推而不居聖德謙沖固難名於廣大臣子之志敢忘義於昭宣況臣等近侍軒墀倍百恆品望以邠王等狀宣付史館謹錄狀

奏聞伏聽敕旨

薛王薨上損膳請復膳狀

右未經旬時慘恤相次聖情友愛之至屬此天倫之戚伏聞寢膳有改乎常臣等下情不安夙夜惶灼伏願抑損恩命沖用道心以承宗社之重以慰臣庶之望天下幸甚臣等不勝倍百恆情之至謹奉狀以聞死罪謹奏

請御註道德經及疏施行狀

右臣等伏以至道無名常善救物所以鎮彼澆競登諸福壽而古今殊論穿鑿多門徒廣津梁何階閭闕伏奉恩敕

賜臣等於集賢院與諸學士奉觀御注道德經及疏本天  
旨元遠聖義發明詞約而理豐文省而事愜上足以播元  
元之至化下足以闡來代之宗門非陛下道極帝先勤宣  
祖業何能迴日月之晷度鑿乾坤之戶牖使盲者返視聵  
者聳聽蒙蔽頓祛沈迷有適凡在率土實多慶賚無任忻  
戴忭躍之至請宣付所司施行

賀雨狀

右伏以自春降澤粟麥已滋首夏再旬時雨稍晚陛下念  
淡萬姓恩覃庶獄將有事山川用達精意德音纔發甘靈

滂流此誠聖感必通天應如答臣等忝居近侍倍百恆情  
無任忭躍之至謹奉狀陳賀以聞謹奏

論教皇太子狀

右臣伏以皇太子是天下之本爲國之貳今則睿質漸長  
猶在深宮所與近習者未必皆正人端士安於逸樂久則  
性成是以古者明王恐其若此雖在赤子先之以教必使  
耆儒碩德爲之師保故大戴禮云周成王在襁褓之中太  
公爲之太師教之順也周公爲之太傅傳其德義召公爲  
之太保保其身體是故成王能聖周道用康秦始皇使趙



高傳其太子胡亥因教之以獄所習者非斬剗人則夷人之三族也胡亥卽位秦氏以亡則明人之性情莫不由習若近正人聞正事雖欲爲惡固已不忍若親近細人不聞教諭縱欲行善猶未知所適此必然也胡越之人生則聲同長則語異蓋聲者天然語者所習習於胡則胡習於越則越故知成於所習不可不慎臣伏願詳擇典故徵用名賢執經勸學朝夕從事俾皇太子得於所習天下幸甚謹奉狀以聞謹狀

論內勘別宅婦女事狀

右件婦女事緣卑褻縱兩縣檢括有所阿容卽願宣付憲  
司糾摘其罪今便收捕入內別加推逐道路有云何急於  
此若在外勘當慮以相寬其餘法獄豈皆應就內始可以  
杜其請託方益威嚴便是法不肅而吏不懼其弊尤重於  
別宅者也昔漢丞相府尚不按吏誠以務在尊崇體不可  
失況天子中禁而有此名丞尉極微所緣至小固不足以  
塵黷聖聽雖在內曹外議切切未爲得所卽有聞知不敢  
不奏謹狀

論東北軍未可輕動狀

右高力士宣奉敕張守珪所進送突厥生口具問知委曲故令劉思賢去者臣等伏以北虜凶狡誠亦難保其心然陛下以恩澤懷柔歲月已久使彼豺武頓改頑暴以事觀察信然不虛何者昨李佺使迴虜亦具云東下中間或言難信至今果如所說卽是輸誠於國未有他詐且契丹等翻覆或往或來今其東討雖未稟命在於夷狄亦不可責於常理若因而屠之亦便除患陛下先有聖料以爲如此臣等常竊志之固非所及今其來也若契丹等偶勝北虜勢衰因而乘之滅其大半審料必取始可決行事若不然

而軍將妄動徒結大隙亦以不信爲國生患莫甚於此臣  
伏以在邊諸將苟利一軍便卽行之以邀榮賞不思遠計  
誠是大失今劉思賢往望將降書處分守珪必爲遠圖無  
得妄動防約諸將使知聖心縱虜庭聞之尤彰天澤未審  
可否謹錄狀奏聞

請東北將吏刊石紀功德狀

右奚契丹尤近邊鄙侵佚是慮式遏成勞臣庶常情惟欲  
防禦所謂長策無出此者陛下獨斷宸襟高奪羣議以爲  
頓兵塞下轉粟邊軍曠日持久役無寧歲若不因利乘便

一舉遂平使遷善者自新爲惡者就戮事若不爾無息我人且今大兵臨之凶徒必潰不出此歲當並成擒臣等初奉聖謀高淡未測及聞凱捷晷候不差而兩蕃遺噍莫不稽顙緣邊戍卒咸以返耕臥鼓滅烽誠自此始斯皆陛下睿謀先定神武非常觀變早於未萌必取預於無象伏以成功不宰君人所以爲量有美不宣臣子所以成罪臣雖蒙瞽安敢無言旣預聞始謀又幸見成事豈可使天功虛往而日用不知竹帛相傳復紀何事請具狀宣付史館垂示將來仍請將吏等刊石勒頌以紀功德臣某等不勝區

區忤躍之至謹奉狀以聞謹奏

請御註經內外傳授狀

右臣等今日於九齡處伏見集賢院奉賀御註前件經墨  
敕批答兼九齡說睿思幽贊元關洞闢微言奧旨廓然昭  
暢臣等近識暗於大道粗聞九齡此傳便若已有所得欣  
戴感悅誠不克任伏惟陛下天縱無方有來斯應萬殊一  
貫三教同歸伏望降出御本使內外傳授則冀明積劫之  
重昏納羣迷於正覺朝聞夕死尚不足恡顧此輕生於焉  
何幸臣等不勝忤躍之至

西幸改期請宣付史館狀

右臣今日面奉進止西幸有日般運已去仍聞京畿百姓猶有未安倘來歲未熟下無所向朕雖至彼復有何情欲延期至來冬待看穀麥卿等商度以爲何似臣等具奏洛陽城闕雖曰皇都至於宮苑之間制度本狹然風土氣候不甚宜人陛下以萬姓爲心萬姓以陛下爲命億兆所繫誠在聖躬聖躬若安何顧小小陛下遂當寧動色再降德音苟利於人朕何顧惜發言惻隱感動神祇臣等幸聞至言不覺承睫聖恩愛育遂及於此又敕臣等商量進來者

湛恩至德焉可使朝臣不知聖君鴻名不可令史官無述  
臣望宣聖旨改用來年十月幸西京仍望具將本狀徧示  
朝列并宣付史官等臣不勝感戴踴躍之至

上爲寧王寫一切經請宣付史館狀

右臣奉敕今日於安國觀行香伏見天恩爲寧王及故惠  
宣代國金仙公主共寫一切道經四本伏以睿恩友愛情  
深天屬生成之德無隔存亡利益之資方宏道要諸經畢  
繕景福雲集稱贊茲日功用有成教義是先誠所感慶臣  
無任欣戴之至望宣付史館奉狀以聞謹奏



賀張待賓奏尅捷狀

右高力士宣示臣等張待賓表臣等前因奏事親承聖旨  
懸料數日當有捷書及此使至皆如審略但狂胡背誕圍  
逼軍州凶力固已困窮邊城一無所損臣等伏料此賊早  
是破傷大眾遠來踰月乃去馬羸則多死人苦則計生本  
是烏雜之徒足徵破亡之漸此皆皇威遠讐氛祲坐銷豈  
伊邊人所能自保臣等幸忝樞近承奉聖謨邊捷有符不  
勝慶悅謹奉狀陳賀以聞仍望宣付史館謹奏

欽定全唐文卷二百八十九目錄

張九齡<sub>七</sub>

賀誅賊狀

賀奚契丹並自離貳廓清有期狀

賀誅奚賊可突于狀

賀破突厥狀

賀東北累捷狀

賀依聖料赤山北無賊及突厥要重人死請宣付

史館狀

先是信安王禕承王忠嗣警因牒云赤山有賊

賀突厥小可汗必是傷死狀

賀聖料突厥必有亡徵其兆今見狀

賀蓋嘉運破賊狀

賀賊蘇祿遁走狀

賀雪狀

謝侍講徧賜衣物狀

賀雨晴狀

賀雨狀

賀雪狀

賀祈雨有應狀

賀太陽不虧狀

賀祥雲見狀

賀麥登狀

賀衢州進古銅器狀

賀御製開元文字音義狀

賀論三教狀

賀御註金剛經狀

賀皇太子製碑狀

賀上仙公主靈應狀

賀昭陵徵應狀

謝加章紱狀

謝工部侍郎集賢院學士狀

謝知制誥狀

謝兩弟移官就養狀

謝中書侍郎狀

謝敕賜大麥麴狀

謝賜食狀

謝賜藥狀

謝賜尺詩狀

謝蒙太子書頌狀

謝兩弟授官狀

謝賜衣物狀

讓賜蕃口狀

觀御製喜雪篇陳誠狀

謝賜御書喜雪篇狀

讓賜宅狀

金  
卷之八  
三  
讓兩弟起復授官狀

謝赴祥除狀

進龍池聖德頌狀

謝弟授官狀

謝賜詩及衣服絹狀

謝賜馬狀

欽定全唐文卷二百八十九

張九齡

七

賀誅賊狀

右蓋嘉運奏北庭解圍仍有殺獲蘇祿背德敢此讐天盡  
驅犬羊來犯軍鎮雖肆凶毒欲逞其心而邊兵無遺鏃之  
費狂賊有輿尸之禍此皆陛下聖武將士龔行遠必叶謀  
動無遺策能令氛祲坐自廓清臣等忝奉密謀屢承獻捷  
踴躍稱慶倍百恆情謹奉狀陳賀以聞謹奏

賀奚契丹並自離貳廓清有期狀



右適高力士宣示臣等張守珪奏契丹及奚並自離貳兼  
安祿山復有殺獲賊數將盡觸緒猜攜邊鎮勒兵伺隙而  
動誅翦有日廓清可期此皆天威遠臨逋逃自滅臣等不  
勝慶躍之至

賀誅奚賊可突于狀

右高力士宣示張守珪所上逆賊契丹屈烈及可突于等  
首級此等惡稔喪敗將及故天誘其衷旣降又貳而感義  
之士惡其翻覆背恩之賊已就誅鋤幽障廓清華夷俱靜  
計其餘噍永無動搖陛下邊任先擇聖謀獨斷克稟成命

樹此戎功且知河朔無轉輸之勞林胡爲賦稅之地臣等  
忝在樞近預聞遠績捷書之至喜倍恆情謹奉狀陳賀以  
聞謹奏

賀破突厥狀

右張守珪表奏突厥四萬騎前月二十五日至能訖離山  
契丹泥禮等前後斬獲俘馘數逾十萬突厥可汗棄甲逃  
亡奚王李歸國及平盧軍將等追奔逐北計日殲滅更聞  
奏者伏以突厥新立輕事用兵彼之威眾在於一舉又兩  
蕃與其結隙交構未浚在於邊隅猶軫天算陛下料其終

始指授規模知其舉種盡來本自無策勞師襲遠必合成擒使蕃騎先鋒漢軍堅壁坐觀成敗自戰蠻夷今契丹纔交突厥已破計其奔北必至喪亡脫身獲全亦舉眾皆棄北虜震懾從此氣衰東胡保邊永不攜貳寬徭罷析自此可期斯皆聖德遠覃皇威遐振事無遺策舉不失圖臣忝跡樞近親承睿略忭躍之至倍百恆情謹奉狀陳賀以聞謹奏

賀東北累捷狀

右今日劉思賢至奉宣聖旨垂示臣等破賊所由兼見守

珪表奏具承契丹累捷伏以聖武所加制勝者無失天威  
不抗犯順者自亡突厥負眾背恩窮凶遠襲兩蕃懷德誓  
死如歸三軍奉國從命如指遂使一戰便剋已聞殺傷無  
算慟哭而奔則知主將必死且蠻夷相伐我則不勞疆場  
有虞義亦奚失固知無愆信於漠北有大造於燕垂此實  
獨斷神謀事皆有預萬全之策永靜邊隅薄伐之師匪勞  
中夏凡在黎庶孰不欣躍臣等忝預樞近倍百恆情無任  
慶悅之至

賀依聖料赤山北無賊及突厥要重人死請宣付

史館狀

先是信安王禕承王忠嗣警因牒云赤山有賊

右先得前件牒云九月三日奚揆見賊無數前三日臣等面奉聖旨料此必安祿山所將之兵奚疑是賊便有此牒也臣等當時又奏突厥舉國大來微有輸失便去竊料此意恐其有謀陛下又云必應彼有要重人死所以卽去今日幽州節度判官監察御史張曉至云今月十一日從幽州發來赤山元自無賊奚所見者正是安祿山下兵馬又云契丹有蕃落人走來云突厥之兵馬平章事第一人死所以狼狽卽去在路每日於帳衛前哭此並聖心懸照有

如目擊臣等親奉睿算及此符同萬里無差不勝驚喜無任踴躍之至仍望宣付史館

賀突厥小可汗必是傷死狀

右牛仙童宣敕送前件契丹令問委曲者臣等借問突厥退散所由其伊吐于被擒將隨五日因夜却走迴每日實見突厥諸將皆於衙帳前哭及務正面是實據此必是小可汗傷死若其不然不合如此審觀伊吐于情狀亦卽不敢妄言必其不虛乃是天敗比其歸至本處固應更有餘殃醜虜破亡必自此始也陛下聖德無遠妖沴自銷不勞

師徒已清朔漠臣等獲奉廟算不勝忭躍之至

賀聖料突厥必有亡徵其兆今見狀

右林招隱宣敕示臣等張守珪云契丹婦女屈將從突厥  
出來知可汗死是實又云黃頭突厥與默啜突厥爭言氣  
兵馬欲鬪驚軍屈將然得走來者參驗前後從突厥來者  
說事多同況此婦人尤爲指實死旣非謬天實誅之且諸  
蕃之中北虜爲桀不待征戰而自取殲夷此誠天助有道  
坐清妖祲陛下嘗有聖料者知其必有亡徵今云兵馬自  
爭其兆已見佇聽其敗但只納降亭障息兵將自此始不

勝欣慶之至

賀蓋嘉運破賊狀

右高力士宣奉敕示臣等王尚客奏狀知蓋嘉運至突厥施店密城逢賊便鬪多有殺獲且凶黨大眾見在邊城方擬經春圖爲邊患忽聞嘉運此入復有破傷必其驚忙當有攜散皆是聖略先定萬里懸同尚客所言合符前者臣等不勝慶躍之至

賀賊蘇祿遁走狀

右高力士宣敕示臣等曹待宣奏狀知蘇祿遁走入山出



界者四鎮懸遠比被侵逼將士用命雖有誅鋤凶黨尚多  
時有抄掠兵疲矢盡爲弊亦深今日奔亡誠是震懼聖威  
及遠氛沴坐銷又北庭救兵當時迴旆不費軍廩事且無  
憂吐蕃縱實西行蘇祿不得相應其敗可必又無可憂邊  
事且寧不勝慶慰謹奉狀陳賀以聞謹奏

賀雪狀

右伏以至德惟勤親躬以勸大禮云畢勞酒加歡聖感天  
從豐年雪應始降澤於千畝將有盈於萬箱臣等忝陪近  
侍載深慶躍無任悅豫之至謹奉狀陳賀以聞謹奏

謝侍講徧賜衣物狀

右高力士宣稱陛下親講讀毛詩徧賜侍講陳希烈三品兼賜衣物等伏以睿思元通超然物表俯臨天下必樹風化旣宏儒教考覈詩人爰託師資親行講讀章句初畢賞錫有加明主深恩孰不知勸臣等謬承任遇實愧經通聖業彌深微誠何補方思敦學以助明時無任悅豫之至

賀雨晴狀

右今月十日高力士宣聖旨以霖雨方滯有害稼穡之憂將親禱上陽三日內不坐精意朝發而重陰夕霽乃數日

已來遂致開朗誰謂天遠其應甚速遂得麥秋有望蠶事  
且登則知至人無心與天地合契神功潛運豈陰陽不測  
伏惟陛下明德自廣兢業載懷所致休徵必加謙慎天聖  
相合福施羣生日用不知年和在臣等無能翊佐徒忝  
近密每有大猷承奉不暇無任欣戴慶躍之至

賀雨狀

右畿輔之間秋來少雨聖心有軫稼穡惟憂德至于天慶  
自嘉節實有神應旋降甘雨使將枯之苗有同於再熟已  
息之望不意於萬人臣有限不獲當時稱慶無任悚踴之

至

賀雪狀

右伏以自冬少雪粟麥未滋歲律向終農候方近陛下黎庶在念憂濟常深聖心精誠天意昭感孰云元遠不日有應遂得盈尺告祥動植霑洽豐年有望卽事可期卽表非常之祥實倍不任之喜不勝忭躍之至

賀祈雨有應狀

右臣一昨面奉恩旨緣秋稼有望時雨愆愆念及黎元見於顏色方躬自祈請誠勤夙夜上靈昭鑒嘉瑞必臻昨日

申酉之間雲物果應初含五色正覆於壇場未及終宵更灑於城闕遂使炎埃宿潤虐暑暫消實冀膚寸之資畢致普天之澤臣等多昧徒仰於成造蒼生何幸每及於聖私無任欣戴忭躍之至謹奉狀陳賀以聞既有殊應仍望宣付史館

賀太陽不虧狀

右今月朔太史奏太陽不虧據諸家歷皆蝕十分已上仍帶蝕出者今日日出百司瞻仰光景無虧臣伏以日月之行值交必蝕算數先定理無推移今朔之辰應蝕不蝕陛

下聞日有變齋戒精誠外寬刑政內廣仁惠聖德日慎災祥自弭若無表應何謂大明臣等不勝感慶之至謹奉狀陳賀以聞仍望宣付史官以垂來裔

賀祥雲見狀

右臣等伏見道門威儀司馬秀表稱今月十日夜陛下親臨同明殿道場爲宗廟蒼生祈福有祥雲見伏惟聖德以精至動天天意以肸鬻符聖其感甚速其應豈遠陛下聖敬之深勤恤所至靈心如答神道何言自表休期以介景福生人大賴天下幸甚臣等忝居近侍倍百恆情謹奉狀

陳賀以聞伏望宣示史館

賀麥登狀

右今日高力士宣示臣等皇太子表以嘉麥有成陛下躬  
執勞事率先兆庶皇太子以下繼美聖功臣聞勤於稼穡  
必有來麴之慶著在春秋則非他穀之比伏惟陛下致敬  
宗廟屬念黎元春郊順時則千畝在御禁園測候則萬寓  
皆豐況云立訓天人降尊農務上靈昭德已聞瑞日增輝  
當暑不疲則有祥雲自覆是彰敦本之化式精造物之功  
人謠在茲天意可鑒且禹之盡力堯實用心史策美談帝

王成範未有休徵神應若斯之盛者也以今況古千載未聞請付史官天下幸甚臣等叨榮近侍倍百恆情無任感戴忭躍之至

賀衢州進古銅器狀

右伏見衢州所進瑞魚銘等神物瓌奇形製純古魚爲龍象旣彰受命之元銘作龜文更表錫年之永河圖舊事無以加之臣叶贊休明屢承福應忝惟拜慶倍百恆情伏望宣付史官傳之不朽無任喜躍之至

賀御製開元文字音義狀



右今月日尹鳳祥宣敕旨示臣等聖製開元文字音義三十卷義微旨遠文省理該表隸以訓今存篆以徵古眾釋大備取證於前修片言旁通去嫌於翻字信文思之精一學術之明準非聖心之善誘焉降情於豪素臣等忝居近侍再忭發蒙捧戴之誠實百恆品望今集賢院更寫一本付外流行謹奉狀陳賀以聞謹進

賀論三教狀

右伏奉今日墨制召諸學士及道僧講論三教同異臣聞好尚之論事蹟於偏方至極之宗理歸於一貫非夫上聖

孰揆要旨伏惟陛下道契無爲思該元妙考六經之同異  
詮三教之幽蹟將以降照羣疑敷化率土屏浮詞於玉殿  
輯精義於金門一變儒風再揚道要凡百士庶罔不知歸  
臣等幸侍軒墀親承至訓忭躍之極實倍常情望宣付史  
館謹奉狀陳賀以聞謹奏

賀御註金剛經狀

右內侍尹鳳祥宣敕垂示臣等御註金剛經但佛法宗旨  
撮在此經人閒傳習多所未悟陛下曲垂聖意敷演微言  
幽關妙鍵豁然洞達雖臣等愚昧本自難曉伏覽睿旨亦

卽發明是知日月旣出天下普照誠在此也陛下至德法  
天平分儒術道已廣度其宗僧又不違其願三教並列萬  
姓知歸伏望降出御文內外傳授

賀皇太子製碑狀

右尹鳳祥宣聖旨示臣等皇太子所製王尊師碑文並壽  
王書臣等伏以天姿自高更演聖訓文藝英拔理絕人境  
臣等周章省覽欣忭載懷兼皇太子文義高演壽王毫翰  
灑落朝臣不見竊懼蔽善臣等專輒宜留碑本望明日將  
示百官了訖續進不勝忭躍之至

賀上仙公主靈應狀

右臣等伏承今月八日上仙公主靈座有祥風瑞虹之應爰至啟殯乃知尸解又承特稟清虛薄於滋味素含真氣自不食鹽洎於遷神更標奇跡伏惟聖系本於道源妙有所鍾靈異必降不然者何得幼而能悟性與非常適來以時且契於元運超然而蛻復昇於丹籙杳冥雖遠髣像如存則知仙路有歸慈念已釋理絕今古事昭聞見況臣等親侍軒墀幸聞仙解無任感慰之至伏望宣付史官以昭靈異仍望宣示百官

賀昭陵徵應狀

右御史中丞徐惲從京使還向臣等說妖賊劉志誠四日從咸陽北原向南見昭陵山上有黑雲忽起志誠謂其凶徒云此雲將有暴風若衝頭立恐有破敗志誠久從軍伍頗解雜占其言未畢飄風果至直衝行首莫不昏迷眾心驚惶不知所出及至便橋之際並卽走散又見父老云往年權梁山之徒將逞不軌當時亦有烈風暴雨發自昭陵彼比至京城賊還破滅謹參往事與今同符者伏以閭閻賊類竊敢猖狂而祖宗威靈亦已元鑒昔年感召若命蚩

尤今者驅除更徵風伯所以妖氛自殄狡計莫施晷刻之閒逃形無路此皆神功潛運昌厯無窮將俾孫謀用昭聖德事堪懲惡可以垂後無任慶悅之至仍望宣付史館並示朝列謹錄奏聞謹奏

謝加章紱狀

右伏奉去月三十日敕以臣先領荊州都督佩紫金魚袋前緣改官遂停今更蒙恩特賜任使無效寵服再加臣雖叨榮伏用戰懼不任悚躍之至謹奉狀陳謝以聞謹奏

謝工部侍郎集賢院學士狀

右伏奉今月三日制除臣工部侍郎兼集賢院學士臣本  
單族過蒙獎拔入升省閣累登清資出牧南州且無成績  
陛下殊私俯及擢任集賢遠自炎荒忽至霄漢祕文副掌  
淺陋無堪遽蒙聖恩反遷華省邱山施重報效何階不勝  
悚懼之至

謝知制誥狀

右臣忝跡集賢久無成效幸免咎責伏用兢惶忽蒙特恩  
令知制誥臣學業既淺識理非長述宣聖旨誠恐不逮跪  
受嚴命伏增悚惕無任戴荷之至

謝兩弟移官就養狀

右臣兩弟蒙恩移官就養老母感戴殊澤戰荷兼淡臣山  
藪陋材豈堪國用日月私照謬掌綸言犬馬以地近見矜  
烏鳥以情至蒙福曲承孝理之賜莫知報效之所無任悚  
懼荷恩之至

謝中書侍郎狀

右臣謬跡書府兼司綸翰思力淺近無所發明聖恩不以  
不才却賜榮獎拔擢非次荷躍惟深但中書近密參掌不  
易豈臣微賤所堪忝竊拜命之日伏用慙惶不勝戰荷之



至

謝敕賜大麥麵狀

右林招隱宣敕賜臣等招隱說云薦新之外禁中所出皆是降至尊親耕稼穡之所成也伏以周人之禮惟有藉田漢氏之薦但聞時果則未有如陛下嚴祗於宗廟勤儉於生人事必躬親動合天德臣亦何幸近奉徽音又蒙聖恩猥垂珍錫已飽於聞義況霑此時羞繆承渥澤未知報效死罪死罪仍望宣牒史館以示將來臣等不勝感荷之至

謝賜食狀

右臣等面奉進止令就集賢院與諸學士等觀聖注道德經尋又賜臣等食竊味道腴兼承珍饌聞義飽德虛往實歸臣等何人叨承渥澤不勝惶悚感戴之至

謝賜藥狀

右高力士宣奉恩旨賜臣等鹿角膠丸及駐年面脂有命自天感戴兼至臣等涓滴無補渥澤日深多謝股肱之良每慙智力之效徒承聖恩同體之義更霑御藥駐年之錫事絕希幸禮優常遇微軀賤貌因大造而載延捧日承天荷曲成而無極臣等無任悚戴之至

謝賜尺詩狀

右今日高力士宣敕賜臣等御製詩並寶尺伏以尺者紀  
度之數空麗天文詩者律呂之和是生節物聖恩下逮天  
旨旁流因物寓言以言垂象臣雖瞽陋伏見宸衷竊謝良  
工徒秉刀尺終期死力取配鈞衡而未副所圖退省知罪  
臣等不勝負荷感懼之至

謝蒙太子書頌狀

右昨者高力士宣恩旨垂示皇太子書紀功德頌恭覽睿  
跡實天人之表幼傳楷則訓叶文明春秋典學時惟多藝

鸞鳳變態入神妙而難明俾臣庸者憑篆刻而不朽微臣之幸倍百常情無任悚戴之至

謝兩弟授官狀

右伏奉昨二十日恩命授臣弟九皋殿中丞九章太子司議郎臣私門積釁殃罰如昨日月逾邁禮及外除弟九皋等加以常才比服哀疚瞻望未遠縞練猶存非常之恩一朝總集慙惶哽咽罔識言次不知微命餘生何以上報大造載悲載懼五情飛越不勝感戴戰慄之至

謝賜衣物狀

右高力士宣敕賜臣衣及器物等臣九齡不孝苟存企及  
禮制天恩以忝樞近賜問再臨衣服珍器殊常寵錫臣有  
何力可以叨濫渥澤至深誠効已竭惟有微命不知所圖  
無任感戴惶悚之至

讓賜蕃口狀

右高力士宣聖恩賜臣等蕃口執自邊軍釋囚爲隸誠宜  
供國次及賞功臣等無庸何以受賜殊恩俯降循涯自失  
伏望俯停渥澤存以至公矜遠懇誠許歸官寺則上有無  
偏之道下有無苟之責無任悃款之至

觀御製喜雪篇陳誠狀

右臣等適見工部侍郎侍講學士陳希烈所蒙恩賜聖製雪篇伏以聖惟無作作則應天地和陰陽斯之謂矣言微利溥旨遠思深於彼蒼生焉知帝力臣聞食者萬姓之命雪爲五穀之精兆且見於祈年律旣和於言志聖心昭感天瑞合符豈比夫漢咏白雲但嗟歡樂周歌黃竹徒事巡游而已哉臣等仰望昭回莫知遠近幸均生植同是霑濡況臣忝在樞衡無能翼亮聞罪已之義若寘冰谷循念軀之節冀益涓塵伏誦聖文無任喜懼臣等誠歡誠恐謹言

謝賜御書喜雪篇狀

右臣前伏見聖製喜雪篇奉狀稱慶已特蒙賜本今日高力士又宣賜臣林甫臣某各一本麗天之文或冀傳誦垂露之聖難有偏霑則不知元造曲成宸豪俯逮鸞鳳斯降雲雨載均愚臣何幸叨此殊賜是知君臣之深義感不一子孫之後傳寶無窮而未知此生何以上答臣等不勝感戴伏望許臣等進食以申微誠雖廚蕙每搖而野芹徒獻豈云堯禹之膳冀達臣子之情幸甚幸甚謹奉狀以聞謹奏

讓賜宅狀

右去正月二十六日中使李仁智宣口敕賜臣前件宅仍  
令官修及什物一事已上自奉恩命夙夜憂惕旣慙虛受  
載懼滿盈臣生身蓬華所居賤陋釁屬苴麻豈圖宏敞宸  
私曲被寵賜猥臨加以殃罰之餘參議樞掖草土之末庇  
形棟宇器用資於官備禮數異於喪紀兢惶失圖啟處無  
地況涓滴未効需澤先盈非據之責誰任其咎又臣見在  
家累僅十餘人臣之俸祿實爲豐厚以此貿遷足辦私室  
今崇其甲第更使增修或恐因緣多有費損上則虧耗國



用下則招集身尤縱陛下時垂寬容而臣苟爲貪冒其如物議何其如公道何伏乞賜寢前命俯垂矜察納臣誠請免臣罪戾其宅及什物望並却令官收無任惶懼之至

讓兩弟起復授官狀

右臣昨以兩弟身官狀涉隱冒家且未正焉能正人所以陳露奏聞誠欲自律今日高力士宣敕令與兩弟京官慈旨優柔感淡骨髓微臣何有叨此殊恩但臣自罹殃罰纔踰年序忝承重任不敢顧私而鞠育之恩終懷罔極几筵在遠奠醑不親惟有兩弟在家獲申情紀今若恭承恩命

盡在墨纒何心何顏可以偷此陛下每宏教義必先名節  
豈於愚臣無少矜憫若使九臬等獲免罪戾幸無削除在  
臣閤門已霑殊澤更令授職俱遠哀次於臣私情實所不  
忍然於朝議必有喧黷乞寢成命俯亮愚衷冀無玷大猷  
豈敢自遂而已不勝哀荷戰懼之至

謝赴祥除狀

右殃釁殘生謬承天澤無能報效徒廢情禮而日月迅速  
祥制有期在臣私情哀懼莫主几筵在遠追慕不親一違  
外除終身何託伏望察臣罔極俯遂哀懇假以傳乘暨赴

來月道路往復不出數旬孝理之恩冀知死所無任悲迫  
戰懼之至

進龍池聖德頌狀

右先奉敕令臣撰文伏以天將啟聖地乃出符歷考圖籙  
曠古未有臣學術膚淺且靈命難言雖已極於愚思曾未  
徵於萬一猥承恩獎虛污磨礱以此慚惶無寧啟處謹隨  
狀封進以聞塵黷宸嚴伏增戰越

謝弟授官狀

臣伏以聖恩非常拔臣以無能受任歲月漸久涓埃無益

取招毀議有累聖明臣前面陳誠以請罪陛下不以賜責  
又加過恩特以殊榮猥霑臣弟彌速曠官之謗且重非才  
之責累延公器寵及私門顛覆是憂隕越無措不勝悚懼  
荷戴之至謹奉狀陳謝以聞

謝賜詩及衣服絹狀

右中使某至特蒙恩曲賜遠別之什又中使某宣口敕賜  
衣一副並絹一百匹者但柱礎雖下感致於青雲陽燧則  
微昭應於白日在臣孤賤亦荷寵光伏惟陛下御札龍躍  
八體比之未雄天文鳳章五色對之猶淺況束帛荐至衣

服仍臻施重邱山恩浚江海實爲九族遍有光華匪唯賤  
陋獨稱榮慶

謝賜馬狀

右今日高力士奉宣聖旨賜臣紫騮馬一匹伏以恩覃不  
次寵遇非常有忝股肱之臣頻奉渥注之賜況郊壇展禮  
尚未奠於九宮而雨露浚恩反有叨於三接雖鳴珂歎王  
朝天永代於臣勞而任重才微久歲寧酬於聖造荷負無  
力答効何階